

# Appel da cuntinuar cun La Quotidiana

**I**ls 17 da mars 2017 ha La Quotidiana, edida da la Samedia SA, pudì festivar ses 20avel anniversari. Paucs dis suenter la festa da giubileum ha l'editura annuncià da vulair smetter cun La Quotidiana la fin da 2017 – sch' ella na survegnia betg en l'avegnir 300'000 francs ad onn per la finanziar. Uss è il schefredatur vegnì relaschà per la fin da l'onn.

**I**ls tschintg iniziants da questa pagina fan in appel da cuntinuar cun La Quotidiana ed envidan Rumantschas e Rumantschs ed era autras personas interessadas da signar quest appel, er en solidaritad cun Martin Cabalzar.

**M**algrà resistenzas ed encunter la paisa dal particularissem regional ha La Quotidiana fullà via passa 20 onns a l'unitad uschè necessaria en la pitschna cuminanza rumantscha. Ella ha dà a quella ina ferma vusch, lunsch sur ses cunfins tradiziunals or.

**Q**uai è surtut il merit dal schefredatur Martin Cabalzar. Nus engraziain ad el per l'engaschament e la perseveranza. Ils resultats cuntanschids obligheschin vinavant – per amur da la chaussa ed en solidaritad envers Martin Cabalzar.

**C**un relaschar il schefredatur fa la Samedia SA quai ch'interpresa fan: ella metta ses interess economics en il center e fa squitsch. Nus na la vulain betg reproscar che realisar La Quotidiana è bain stà per ella mo ina lavur sco bleras autras era. Tuttina astg' ins spetgar ch'ella porschia maun, almain per ina soluziun transitorica fin ch'ins chatta ina nova via a lunga vista, quai era ord responsabladad envers ses schefredatur da La Quotidiana.

**N**us engraziain al Cussegl federal per sia risposta positiva sin l'interpellaziun dal cusseglier nazional Martin Candinas e per sia prontadad da sa gidar, sch'il chantun Grischun e la Lia Rumantscha fan er quai. Uss è perquai il mument gist da sa metter ensemen e realisar per La Quotidiana in'organaziun purtadra rumantscha, messa en discussiun gia questa primavaira.

**I**na gassetta dal di – stampada ed en l'avegnir era online – è indispensabla per la Rumantschia per preschentar sia vita, defender ses interess e per deraisar e sviluppar ses linguatg. Nus appellain perquai a la Lia Rumantscha, al chantun Grischun ed a la Confederaziun da prender lur

responsabladad per quest project.

**R**esponsabls per il futur da La Quotidiana essan dentant surtut nus sezs. Perquai in ferm appel a tuttas Rumantschas, a tuts Rumantschs: sustegnai quest appel cun al signar cun Voss num. Ed abunai e legiai La Quotidiana!

## Ils iniziants:

Hans Caprez, Castrisch; Bernard Cathomas, Cuir; Giusep Nay, Valbella; Maria Cadruvi, Ruschein; Gion-Andri Cantieni, Turitg

## Emprimas suttascripziuns (en urden alfabetic):

Luzi Battaglia, Fürstenu/Farschno; Ciril Berther, Oetwil sper la Limmat; Duri Bezzola, Scuol; Flurin Bundi, Turitg; Martin BBundi, Cuir; Claudia Cadruvi, Uznach; Iso Camartin, Turitg; Giusep Capaul, Mustér; Corina Casanova, Tarasp; Flurin Caviezel, Cuir; Cristian Colenberg, Cuir; Dumeni Columberg, Mustér; Walter Decurtins, Trun; Barbla Etter, Thun; Yvonne Gienal, Glion; Jacques Guidon, Zernez; Chasper Pult, Pasqual; Hans-Peter Schreich, Valchava; Rina Steier-Peduzzi, Savognin.

## Signai era Vus quest appel!

En in'acziun spontana han prest 700 personas signà quest appel per cuntinuar cun La Quotidiana. Sustegnì era Vus quest appel cun Vossa signatura sin [www.proquotidiana.ch](http://www.proquotidiana.ch).



**La Quotidiana, la suletta gassetta dal di en lingua rumantscha, è periclitada.**